



 Gygge-Zyttig vo de
JOKER WAGGIS

Usgoob 8 - im Auguscht 2015

Events

Grillplausch 2015

SYTTE 3



Unter der Lupe

Der Mathias

SYTTE 3



Joker Lädeli

Ändlig wiider Neus

SYTTE 2



Fasnachts-Ruggbligq:

D'JOKER WAGGIS totaal versaut ...



Basler Fasnacht 2015 - Die erschti Fasnacht vo de JOKER WAGGIS z'niint uff em Waage: Gruppefotti am Wettstaiplatz vor em Cortège am Fasnachts-Mittwoch, bi beschem Wätter

"Sell(f)y oder sell(f)y nit?!" het s'Sujet 2015 vo de JOKER WAGGIS ghaisse - und genau das het sich wool e mängge gfroogt, wo er sich am Fasnachts-Mäntig uff e Wäg Richtig Cortège gmacht het!

Fir aimol isch s'Wätterglogg zwar nit uff Basler Sytte gsi, trotzdem isch es alles in allem e scheeni Fasnacht worde, hän doch der Zyschtig und Mittwoch fir vyyles entschädigt ...

Derby het alles so guet aafange! Nach em Muttenger Füürsunntig und em tradizioonelle Blaggedde-Verkauf am Baanhof, sin d'JOKER WAGGIS zämme an Moorgestraich. Zwar bi winterlige, aber ushaltbare Temperature, doch vor allem ooni Rääge, isch es e wunderbare Start in d'Fasnacht 2015 gsi.

Nadyrlig het der Wätterbricht fir e Fasnachts-Mäntig scho syt ainige Dääg Firchterligs vorus gsait. Doch wär e richtige Fasnächtler isch, hofft allewyl s'bescht. So isch es au bi

de JOKER WAGGIS nit anders gsi.

Tradizioonell hän sich die maischte vo de JOKER WAGGIS scho Stunde vor em Cortège wiider bim Waage besammet, obwool s'Laade vom jetzige Waage um ainiges aifacher isch, als mit em Alte. Aber d'JOKER WAGGIS geen lieber uff Nummer sicher - und so blyibt au e weeneli mee Zyt zem Plaudere ... oder bereits s'erscht Mol aazstosse. Nachdäm der Draggdoor-Faarer bim Waage yydroffe isch, het me ihn uff e Wäg zem Wettstaiplatz gschiggt - und d'JOKER WAGGIS hän der glich Wäg mit e Drämmli uff sich gno.

Am Wettstaiplatz aakoo, het der Petrus grad emol alles gää und d'Schleuse uff gmacht. Dernoo het's aabe gloo, dass es nimm scheen gsi isch. Und ensprächend het sich au der Waage präsentiert - kuum ai droggeni Stell isch doo derby iibrig bliibe!

Doch no schlimmer sin die ainzelne

WYTER SYTTE 2

FORTSETZIG

Goschdyym dra gsi, denn die zwaiddailte Säuli sin im woorsche Sinn "totaal versaut" worde. Uff der Wildsau-Sytte het däa langhoorig Stoff jeedes no so glaine Wasserdrepfli uffgsuugt, derfir het sich der Stoff uff der Säuli-Sytte als nit wirglic wasserdicht erwysse. Drum isch die allgeman Stimmig kurz vor em Cortège rächt dief im Käller gsi. Und so isch au der tradizioonell Fasnachts-Apero - nit z'letscht wäg de nur seer spärlic erschiinene Gäscht - ins Wasser gfalle ...



E Bild sait mee als 1000 Woort: Bligg uff d'Wettstaibrugg, kurz vor em Cortège ...

Uff der Route isch denn praggtisch alles wiider bim Alte gsi, denn kuum isch d'Laarve uff em Kopf, isch aim s'Wätter ainewäg egal. Numme die halbleere Stroosse hän d'Stimmig jetz no e weeneli dämpft, wobby sich d'JOKER WAGGIS au duur das nit hän us em Konzäpt loo bringe. Im Selfie-Waan isch me duur d'Stroosse und Gasse zooge und het bim ainte oder andere d'Sunne fir e Momänt lo schyyne.



JOKER WAGGIS zelebriere der Selfie-Waan

Der Fasnachts-Zyschtig - ämmel der Nomidaag - gheert allewyy! de Glainschte. So hän au d'JOKER WAGGIS wiider mit em Binggis-Wäägeli d'Innerstadt unsicher gmacht.

Neu het me sich in däm Joor bim Stadtcasino droffe und het nimme die iiberfillt Route duur d'Freye Strooss gno. So isch es - bi dytlig aagnäämerem Wätter wie am Voordaag - iiber e Barfi, duur d'Falknerstrooss in Richtig Märtpatz



JOKER WAGGIS am Fasnachts-Zyschtig gmainsam unterwägs mit de Binggis

gange, wo me sich no kurzerhand fir e Abstächer zem Rümelinsplatz entschiende het. Und vo deert us nadyrlig diräggt ins Bermuda-Dreyegg ... doo dermit isch der Stau vorprogrammiert gsi. D'Binggis hän sich duur das aber nit us der Rue bringe loo, sondern hän intrigiert, gstopft und Dääfeli verdait als gäb's kai Morn

Geege Oobe het s'Binggis-Wäägeli denn miesse em Bar-Wäägeli Platz mache. Nach em Nachtässe am Rümelinsplatz, isch es denn mit em neue, gressere und beliechtete Bar-Wäägeli zur scho tradizioonelle Birsig-Sinfonie gange. Dangg em Wätter, wo zem Gligg so gheebt het, sin d'JOKER WAGGIS no bis wyt nach Mitternacht uff der Gass gsi. S'neue Bar-Wäägeli isch also e volle Erfolg gsi ...

Nach ere entsprächend kurze Nacht, isch d'Miedigkait am Moorge vom Fasnachts-Mittwuch no in de Gnoche gsteggt, doch es het no der meteorologisch Heehepunggt vo der Basler Fasnacht 2015 gwarte. Bi seer frieligshafte Temperature isch das Sauwätter vom Mäntig ändgiltig vergässe gsi.

Nadyrlig hän d'JOKER WAGGIS nomol alles gää. Und au die zaalrich erschiinene Schauluschtige hän iiri Freud gha an de JOKER WAGGIS. Am Oobe het me sich denn emol ebbis gennt. Denn der Thomas het - als Neuling - e Nachtässe mit Schnitzelbängg organisiert ...



Fasnachts-Mittwuch, äänligi Zyt, gliiche Oort, aber vyy! vyy! besser Wätter ...

Ändlig wiider Neus us em Joker Lädeli

E T-Shirt vo de JOKER WAGGIS? Oder e Baseballcap? Oder lieber doch e Wullekappe, fir die kalt Jooreszyt?

Kai Problem - biete miir alles!

Nachdäm miir im Frielig 2014 die zwaite Serie T-Shirts in Uffdraag gää hän, isch s'Interässe esoo grooss gsi, dass mir jetz nomol e wyteri Bstellig gmacht hän.

Ab sofoort griegt me unseri beliebte T-Shirts also wiider in verschiidene Faarbe und Greessene.



T-Shirts: S - XL, blau, gää, grau oder rot

Wyterhii git's im Lädeli au unseri Wullekappe und unser Baseballcap mit em Joker-Logo.



Joker Wullekappe

Joker Baseballcap

Zuedäm git's au immer wiider emol Einzelstigg, so wie in däm Momänt e Softshell-Jagge mit Joker-Logo.



Räschtboschte: Softshell-Jagge, Chf 60.-

Und wo griegt me jetz die Artiggel?

Ganz aifach! Mäldsch Dii bi aim vo uns JOKER WAGGIS - und miir kimmere uns drum! Oder Du schiggsch diräggt e Mail an: jokerlade@joker-waggis.ch

Unter der Lupe: Der Mathias

In dääre Rubrigg wird allewyl ai JOKER genauer voorgestellt. Diesmol näme miir der Mathias unter d'Lupe.

72stunde: Wie alt bisch Du?

Mathias: Zwaimol d'Kurzform vo der letschte Joereszaal ...

72stunde: Wo bisch Du dihim?

Mathias: Abgsee vo zwai kiirzere Unterbrich in Portsmouth und Vancouver, ha ich immer z'Muttenz gwoont.

72stunde: Was machsch brueflig?

Mathias: Nach mim Bachelor in "International Management" ha ich e Stell in der Pathologie vom Unispittel als Junior-Controller gfunde. Mittlerwyle bi ich zum Controller uffgstiige.

72stunde: Was machsch Du in Diiner Freizyt?

Mathias: Nääbe der Fasnacht bi ich seer agktiv bim TV Muttenz Athletics - sig's als Athlet, als Zytmässer oder als Zueschauer an de Meetings. Und denn bi ich amme no im Stadion an de FCB-Mätch aazdräffe. Oder nadyrlig uff der Strooss mit mim Deff.

72stunde: Syt wenn bisch Du bi de JOKER WAGGIS?

Mathias: Duur miini On-Off-Beziehig mit de JOKER WAGGIS isch das nid so aifach!

Mii erschti Fasnacht ha ich im 2002



gha, deertmols bi ich fir e Stephan ygsprunge, wo pausiert het. Die wyterfolgende Joor sin im 2006 und im 2007 gsi. Doch syt der Fasnacht 2010 bi ich dääre Glygge treu ...

72stunde: Wie bisch Du zue de JOKER WAGGIS gstoosse?

Mathias: Als Brueder vom Patrick - em frienere Oobmaa - het's mii irgendetwie doo yyne zooge.

Die erscht Fasnacht ha ich no als Notnagel gmacht, dernoo het sich das aifach so ergää ...

72stunde: Was isch Dii spezielli Funggzioon bi de JOKER WAGGIS?

Mathias: Will mim Vater d'Beggerei gheert, wo d'JOKER WAGGIS alljeerlig die beriemte Lägerli bagge, isch das logischerwyys grad mii Funggzioon. Zuedäm bi ich an der Muttenzer Fasnacht fir Brotware zueständig.

Und denn ha ich au bi unsere Goschdyyim allewyl e weeneli miini Finger dinn.

72stunde: Weeles isch Dii scheenschti Fasnacht gsi?

Mathias: Die scheenschti Fasnacht - das isch e schwääri Frog! Jeedi Fasnacht het ebbis, wo sii ainzigartig macht. Ich dängg, die Speziellscht fir mii isch die erschti Fasnacht 2002 gsi. Deert als junge Schnuifer s'erschit Mol uff em Waage isch e riise Sach gsi.

72stunde: Und Dii scheenschts Erläabnis mit de JOKER

WAGGIS?

Mathias: Doo gilt ebbe s'gliche wie bi der vorhäärige Froog: Es git soo ungläublig vyyl!

Ich dängg, unsere Kick'n'Grill im letschte Joor isch sicher e seer glungene Aalass gsi, wo sich z' erwääne loont. Aber au sunscht git's immer wiider tolli Aaläss mit de JOKER WAGGIS.

72stunde: Was sin Diini Wunsch fir d'Zuekunft bi de JOKER

WAGGIS?

Mathias: Bi de JOKER WAGGIS sinn tolli Type mit vyyle tolle Ydee. Ich hoff, das goot no lang lang esoo wyter ...

JOKER WAGGIS-Grillplausch 2015

Am Samschtig, 29. Auguscht 2015 findet bereits zem säggste Mol unsere alljeerlige Grillplausch statt.

Nachdäm der Grillplausch 2014 ainersyts em Wätter und anderersyts em FCB - wo zytgliche gspiilt het - zum Opfer gfalle isch, hän miir diesmol hoffentlig mee Gligg.

E Termin-Kollisioon mit em FCB isch sicher nit meeglig, spiilt däa doch erscht am Sunntig druff. Bliibt aber no s'Wätter ... doch das ka me ainewäg nit beyyflusse. Und zur Not hän miir jo immer no unser Partyzält derby ...



S'git ändlig wiider ebbis z'gwinne

In dääre Usgoob ka me wiider emol ebbis gwinne! Diesmol git's e Baseballcap us unserem Lädeli fir die schnällscht Antwoort ...

Folgendi Froog hän miir also fir Dii parat:

Uff d'Fasnacht 2015 hän miir JOKER WAGGIS expandiert und sinn esoo zem allererschte Mol z'niint uff der Route aazdräffe gsi. Doo derzue hän miir vor fascht genau aim Joor e wyters Mitgליid uffgno. Miir wänn jetz vo Dir wisse, wie denn syy Naame lutet?

Nitzligi Informazioone findet me au in däm Newsletter ...

Dii Antwoort schiggsch Du bitte bis zem 15. Septämber 2015 per Mail an: redaggzioon@joker-waggis.ch

